

好喜品第二十四 十有三章

好喜品者。禁人多喜能不貪欲則無憂患。

違道則自順 順道則自違

捨義取所好 是為順愛欲

不當趣所愛 亦莫有不愛

愛之不見憂 不愛見亦憂

是以莫造愛 愛憎惡所由

已除縛結者 無愛無所憎

愛喜生憂 愛喜生畏 無所愛喜

何憂何畏 好樂生憂 好樂生畏

無所好樂 何憂何畏 貪欲生憂

貪欲生畏 解無貪欲 何憂何畏

貪法戒成 至誠知慚 行身近道

為眾所愛 欲態不出 思正乃語

心無貪愛 必截流渡 譬人久行

從遠吉還 親厚普安 歸來歡喜

好行福者 從此到彼 自受福祚

如親來喜 起從聖教 禁制不善

近道見愛 離道莫親 近與不近

所住者異 近道昇天 不近墮獄